

Hotel dal parc: Nua è l'automat da caffè?

Sulet in meter quadrat per lavurar

■ **(anr/vi) ler en damaun èn arrivadas entiras rotschas da schurnalists e technichers a Flem. En tut rapportan var 150 schurnalists da l'entira Svizra da la sessiun. Ina schurnalista da l'anr ha fatg in diari da las emprimas uras: 9.30:** A Flem èsi anc ruassaivel. I ha strusch traffic sin via. Sulet intgins schuldads che stattan guardia enturn il Hotel dal parc regordan che la sessiun dal parlament federal cumenza en paucas uras. Chatrar in parcadi n'è oz per fortuna anc nagin problem. Jau parchesch uschè dattiers dal Hotel dal parc sco pussaivel per ch'jau na stoppia betg runar memia lunsch mes laptop e las tastgas. La bagascha ha ina pulita paisa.

9.35: Jau vom tras l'uail idillic dal Park-hotel. I freda da pigns e da mistgel. Fiss bel dad ir a tschertgar bulieus, pens jau. Ma jau n'hai tuppamain betg dad ir suentar bulieus mellens, mabain stos savair nua ch'il center da pressa è. Tuttenina stun jau avant in bellezza hotel. Sa sche quai è jugendstil? Jau na sun anc mai stada en quest parc e sun surstada quant spazius e bel ch'igl è.

9.45: Grazia als mussavias – tuts scrits en rumantsch – chatt'jau svelto il center da pressa. Donn, el na sa chatta betg en il bel hotel d'ansant, mabain en il hotel Belmont ch'è in pau pli simpel.

9.46: Il schuldà a l'entrada dal Belmont vul vesair mes «badge». Jau stos ragudar in urella en mia mappa fin ch'el vegn la finala nanavant sut ils cabels da mes laptop. Il schuldà ma lascha passar.

9.47: La stanza da pressa para l'emprim mument fitg gronda. Ma en vista al fatg che radund otganta schurnalists vegnan a lavurar oz suentar mezdi en qua, tem'jau ch'i vegn anc stretg.

Jau chatt mes plaz: in meter quadrat, sco tut ils auters plazs. Sin quest meter



Il center da medias è endrizzà cun tut las apparaturas technicas necessarias, ma bler plaz per lavurar n'han ils schurnalists betg. FOTO G. VENZIN

quadrat ston mes laptop, il telefon, ils cabels, il palpieri, la buttiglia d'aua, ils sandwichs ed ils slogns avoir plaz. Bunanotg! Perclertg èn fin uss be paucs schurnalists en stanza, uschia pos jau almain ma rasar ora durant ch'jau drizzel en mes plaz.

9.30: Entant ch'jau emprov dad ordinar mia salata da cabels, ma dumonda in schurnalista d'ina gasetta gronda, per tgi ch'jau lavuria. «Per l'Agentura da novitads rumantscha», respund'jau. El fa ina fatscha surstada: «Tge! Quai na datti doch betg!» «Cler ch'i dat quai!» Jau sun empau zachiada perquai ch'jau sun londervi da tschertgar la colliaziun per mia lingia d'internet e na chatt betg ella. Ma finalmain ves'jau la rusna, ed il contact cun mes cabel funcziuna perfin. Prima! Mia luna sa migliura, ed jau prend peda da sclerir si il schurnalista da la gasetta gronda: «Tar ils Rumantschs datti atgna-

main tut. Mo che tut quai ch'i dat è simplamain bler pli pitschen che tar ils Tudestgs, Romands u Tessinai. Nus avain ina gasetta dal di, radio e televisiun, e schizunt ina pitschna agentura da novitads.»

10.05: La colliaziun cun l'internet funcziuna. Ils organisaturs sajan ludads! Jau pos clamar giu mes e-mails, ed il telefon fa per cumond. Flot. Jau emprov da chavigliar mes palpieri uschia ch'el na varga betg vi sin il pult da mes vischin e cumenz plaunsieu a lavurar.

10.25: Pli e pli blers schurnalists arrivavan. Ina schurnalista da la Romandia entra. «Bonjour», di ella dad ault ed enclegentaivel. Jau admir ella per ses curaschi da discurren sia atgna lingua cun tala persvasiun en in intschess ester. Fiss bel, sche nus Rumantschs fissan era

uschè cunscients da noss linguatg sco ils Romands.

10.55: Nairas uras dad ir ad inspectar las salas dal cussegl naziunal e dal cussegl dals chantuns. Ed il pli impurtant: Jau stos dispit savair, nua ch'i ha in automat da caffè!

11.00: Sin via tar la sala dal cussegl dals chantuns ves'jau in'ustaria. Ma las tuaglias alvas ma spaventan, ed jau na gugegel betg da prender plaz. Sper la sala dal cussegl dals chantuns è ina bar fitg nobla. Nagut per mai. Jau less mo svelto-svelto in caffè ord in cup da plastic.

Avant la sala dal cussegl naziunal inscuntr jau in collega. «Sas ti sch'i ha insanua in automat da caffè?» El ma cussegli da guardar en il center da visitas.

11.15: En il center da visitas: stans d'in-

furmaziun tut a dubel. Ma in simpel automat da caffè n'è betg perpes.

11.30: Da return en la stanza da pressa: La mesadad dals plazs èn uss occupads. Blers schurnalists èn anc londervi d'installar lur hardumbel. La temperatura en stanza è creschida per plirs grads, ed ins ha gia avert las fanestras. Sche tuts plazs èn occupads, vegni ad esser en qua sco en in furnel.

12.15: Mes collega arriva. El n'ha betg ils dretgs cabels e na vegn betg da colliar ses computer.

13.00: En la stanza da pressa spizzi gia da suaditsch.

Jau vom a gentar. Suentar mias experienschas cun l'automat da caffè, decid'jau dad ir giu en il vitg a mangiar insatge simpel. Ma da lunsch ves'jau, co ch'il collega d'ansant – quel da la gasetta gronda – sa serva al buffet d'aperitiv avant il Hotel dal parc. Jau vom vi e dumond: «Dastgan ins simplamain sa servir?» «Cler, ch'ins dastga. Mo prenda!» Jau sun immediat pronta da suandar l'exempel dal schurnalista da la gasetta gronda.

Il bun aperitiv da bainvegni sin la bellezza terrassa ma lascha bunamain emblidar ch'i na dat nagin automat da caffè sin l'entir areal.

14.05: En la stanza da pressa èn uss quasi tuts plazs occupads. I vesa ora sco sch'in meteorit fiss stgadanà en ina fabrica da cabels.

14.15: Ils schurnalists che rapportan da la festività d'avertura bandunan cun bloc e rispli la stanza da pressa e sa rendan sin las emporas dal cussegl naziunal.

14.30: Sin il monitor en la stanza da pressa cumenza la transmissiun da la festa d'avertura. I va liber. La battaglia cumenza.